



*Kamis, 15 Oktober 2020*

**Ogen: 1 Raja-Raja 10:10-12**



**Luah Si Meherga**



**M**aba luah sada budaya manusia gelgel nari. Jaman Salomo pe enggo si idah maka mbaba luah enggo jadi budaya ras tradisi manusia. Si e ilakoken pemimpin sada kerajan nandangi kerajan si idahina. Seh asa genduari maka budaya si bagenda tetap denga idalanken kepala-kepala negara i bas kunjungenna ku negara si deban.

I jenda si idah reh Ratu Syeba ndahi raja Salomo ku Jerusalem. Engkai maka ia reh? Erkiteken ibegina ketermurmuren Raja Salomo selaku Raja Israel. Subuk arah kepentarena muat kuputusan, arah kinibayakenna, arah raterna kerajan si ipimpimna, arah kerina rakyat Israel si nggeluh alu dame ras sejahatera bage pea rah jilena Istana si ipajekken Salomo. Merincuh Ratu enda guna ngenenca alu matana jine. Kenca idahna maka kemamangen ia ngidah ketermurmuren Raja Salomo enda. Seh maka pengakunna nina, "La setengah asa si ku begi kerna kepentaren ras kinibayakenndu." Biasa si terjadi belinen beritana asa kinatana tapi Raja Salomo la bage, belinen kinatana asa berita. Ertina la terturiken kalak kerina kai kepentaren ras ketermurmuren Raja Salomo bagi si tuhuna. Meriah ukur Ratu enda, janah iberekenna luahna man Salomo emas ras rempah-rempah ras si debanna bagi ituriken i bas ogenta ndai. Bage me kepekene budaya i bas kegeluhen enda, mehuli kepe kita rukur mbaba luah si banci peturah ukur kalak meriah. Apai nari ka adi luahta e tahu-tahu erguna nandangi kalak si idahi kita, maka kepeken arah e terpuji Dibata bagi si ilakoken Ratu Syeba ndai.

Kebiasaan maba luah enda pe ibas kita kalak Karo lit nge, la ateta reh alu ngambe-ngambe, lit ateta sibaba subuk ibas meriah ukur ras ceda ate. Beras, cimpa ntah bentuk sen pasti enggo sisikapken tandana kita reh.